



**N**icolaus ex nobili familia Stalburgerorum Franckofurti natus fuit, anno circiter millesimo quadringentesimo nonagesimo. Erat is foelici ingenio praeditus. Itaque parentes bonis studijs primam eius aetatem informandam duxerunt. Ea is auidè percepit, atque postea ad ciuilia negotia animum adiecit. Inerat enim ei singularis quaedam ingenij perspicuitas, & morum grauitas. Vnde postea in senatum receptus, res sibi commissas magna dexteritate perfecit. hinc factum ut etiam tandem Praetor Franckfordianus constitueretur, cuius summa est in ea republica auctoritas. Erat autem is pietatis & religionis stu-

diosissimus. itaque Euangelij doctrina percepta eam suscepit, & ut alij idem facerent author extitit. Cum ego anno millesimo quingentesimo sexagesimo quinto Franckoforti essem, adhuc ueneranda canitie insignis rebus praefuit, atq; à ciuibus maximè dilectus fuit, qui etiam mihi has eius uirtutes plurimum praedicarunt & commendarunt, Anon.